

廣文書局印行

小方
壺齋

輿地叢鈔

(三八)

雲中紀程

儀徵高懋功著

歲在壬辰夏四月二十二日甲戌爲大同之行以同行諸子自郡城晚至未及登程遂宿郭外

二十三日於西門外乘羸輿行三十五里至陳堡橋又三十五里至六合之東門六合故隸吾眞明初始

屬之京兆九域志眞州六合縣楚之棠邑也吳赤烏中遣兵十萬斷涂

涂水名

作塘以掩北道南唐於滁水

上建瓦梁堰卽涂塘也何延錫言六合西二十里有堰曰瓦梁水曰滁河由河而上鉅細駢比合五十四流輻輳吳堰中闊橫斷羣山回環不止魚三州氓海四百里其實據天經而絕地緯之要者功未就而罷

景德元年毀之

二十四日行三十五里至江家渡過河卽滁河也源出廬州流至滁州會清流水經六合之瓜步達於江

又十里過雷官集入來安境三十里至水口憶昔歲壬子夏六月從滁陽經此今四十一年矣

二十五日行三十里至滁州郭外之五穿橋遙望瑯琊諸山蒼翠可挹郡縣志滁州漢全椒縣地晉瑯琊王伯出滁中卽此地又三十里至關山環滁皆山此其一也山口兩峰夾峙高數百尋清流關在其上關南唐時置五代史周師征淮李景以皇甫暉爲北面行營應援使帥眾十五萬屯清流關爲周師所敗尋與其都監姚鳳皆被擒宋王銍云淮南無山惟滁州邊淮有高山大川爲淮南屏蔽去金陵才一水隔耳旣失滁州不惟中斷壽春則淮南盡爲平地世宗乘破竹之勢盡收淮南李景割地稱臣者以得滁州阻固之地故也又二十五里至大柳樹驛

二十六日行三十五里至池河驛驛北有池河東流入淮又二十五里至定遠之崇家鋪以大風雨遂宿此縣有靖南侯黃公得功祠崇禎中公曾駐鎮此縣有德於民故至今春秋祀之配位則知縣李君彬彬雲南呈貢舉人亦循吏也以城守功累官廬州府知府潁州道副使陰陵城在縣境卽項羽失道處

二千七百七十里以雨不止仍宿崇家鋪

二十八日行二十里過臨淮之紅心驛又二十里至黃泥鋪又四十里至臨淮縣春秋成公十五年冬十有一月叔孫僑如會晉士燮齊高無咎朱華元衛孫林父鄭公子魴邾人會吳于鍾離鍾離楚邑卽今臨淮縣壽夢時吳楚以此爲界縣境有乘龍洲寰宇志周世宗征濠夜遣兵持炬乘臺駝絕淮濠兵驚以爲鬼乘龍也淮水自潁上界流至壽州合肥水至懷遠合渦水東流府北歷臨淮入泗州至清河口會泗水水經淮水出南陽平氏縣胎簪山東北過桐柏山注山海經淮出餘山在朝陽東義鄉西禹貢導淮自桐柏風俗通曰南陽平氏縣桐柏大復山淮水所出也淮均也春秋說題辭曰淮者均其勢也釋名曰淮草薹草遶揚州北界東至於海也漢地理志淮水過郡西行三千二百四十里青州川

二十九日過浮橋則淮以北矣橋架舟爲之河中有坊曰臨鳳分界三十里至三鋪又三十里過鳳陽縣之王莊鳳陽府漢爲鍾離侯國唐宋曰濠州郡縣志濠州阻淮帶山爲淮南之險寰宇記古鍾離城在州東六里宣氏曰有濠梁之遮蔽則敵始不得以走歷陽濠水出府治鍾乳鎮邪二山合流經城西南有石絕水謂之濠梁東流至新河口入淮又三十里至靈璧之連城驛史記注睢水在彭城靈璧縣東入泗括地志曰睢水首受浚儀縣浪蕩渠水東經臨慮縣入泗過沛水經注曰漢書項羽敗漢王於靈璧東卽此處也垓下亦在縣境內

三十日行三十里過固鎮又三十里至宿州之棠棣鋪又三十里至花莊

五月癸未朔行五十里至宿州北門外州古宿國春秋隱公元年九月及宋人盟于宿史記衛世家孫林父甯殖謀逐獻公懿如宿又酈賁入宿吳世家將舍宿左傳作戚字別地同莊公十年宋人所遷之宿則今宿遷也州東門外有長隄古隋隄云睢水在州之陽故亦名睢陽邗水出境內龍山湖東流入淮又二

十里過浮橋則符離集爾雅莞符離也地多此草故名又二十里至褚莊鋪

初二日行四十里過閔子祠輿圖蕭縣東南八十五里有閔子墓又山東濟南府城東有閔子墓其祠堂有宋蘇文定公記又東昌府范縣南四十里亦有閔子墓以一人而有三墓俱載之地志未知果孰是也又五里過蕭縣胡家莊水經注縣本蕭叔國宋附庸春秋桓公十有五年冬十一月公會宋公衛侯陳侯子襄伐鄭襄宋地在今蕭縣西又十五里至桃山驛謁岳忠武祠讀石刻公所作滿江紅詞廟門內有無字碑則石鏡也以水沃之照人如鑑纖悉畢見土人云公後裔有五六千人占籍於此又五十里至徐州南郭外謁漢高帝廟水經注城卽殷大夫彭祖之國也於春秋爲宋地城之東北角起層樓於其上號曰彭祖樓孟康曰彭城爲西楚文穎曰彭城故東楚也項羽都謂之西楚通典晉立徐州爲重鎮宋王元謨曰彭城南隔大淮左右清汴表裏京甸捍接邊境城隍峻整襟衛周固又自淮以西襄陽以北經塗三千達於濟岱六州之人三十萬戶常得安全實由此鎮郡縣志宋高祖經略中原置府於此自隋氏鑿汴以來南控塹橋以扼汴路尤爲重鎮蘇氏曰魏太武以三十萬眾攻彭城不能下而王智興以卒伍庸材恣睢於徐朝廷亦不能討豈非其地形便利人卒勇悍故邪後山陳氏曰南守則略河南山東北守則瞰淮江故於兵甲爲守攻之地項氏常都臨制四方宋武常守并護南北戲馬臺在南郭外戶部山畔呂梁山在州城東南六十里下有二洪莊子云縣水三十仞流沫四十里波流甚險黃樓在州東北隅蘇文忠公爲守增築徐城以捍水因作樓堊以黃土曰土實勝水因名黃樓城西北舊有漢龔勝故宅酈道元謂卽楚老哭勝處也

初三日蚤微雨於北郭外渡黃河徐本泗水經流至州合汴水循城東南達於淮州境有寒水堰梁貞陽侯蕭淵明伐魏堰泗水以灌彭城者自宋熙寧中引黃河南下遂奪泗水至徐而泗水不能至矣五十里

至柳泉又三十里至利國驛宋吳居厚置利國監鐵冶引沂泗二水通汶泗卽此經一橋則入山東嶧縣境嶧春秋鄫子國又十里至韓莊閘渡運河

初四日行六十里至滕縣之臨城驛旅店并無粥飯以湯餅充飢又三十里過官橋又二十五里至沙河店

初五日行十里過滕縣滕本夏奚仲所封地周以封叔繡左傳滕文之昭也余氏考曰郕城在縣東南春秋莊公五年秋郕黎來來朝按郕曹姓出自郕始封君挾之後挾七世孫夷父顏有功於周封其次子友於郕爲附庸僖公七年夏小邾子來朝卽郕黎來也邾之別封故曰小邾又四十里至界河驛過小橋入郕縣境郕古郕國顓頊後所封六書故曰邾郕同聲實一地也又二十五里至二夏店則嶧山之麓也嶧山一名鄒嶧山在鄒縣南二十里爾雅曰魯國鄒縣有嶧山純石相積構連屬而成山水經注京相璠曰地理志嶧山在鄒縣北繹邑之所依爲名也山東西二十里高秀獨出積石相臨殆無土壤石間多孔穴洞達相通往往有如數間屋處其俗謂之嶧孔遭亂輒將居入入嶧外寇雖眾無所施害永嘉中太尉郗鑒將鄉曲逃此山胡賊攻守不能得今山南有大嶧名曰郕公嶧山北有絕巖秦始皇觀禮於魯登此命丞相李斯以篆勒銘山嶺名曰書門詩所謂保有鳧繹者也爾雅山屬者名嶧注絡繹相連屬通作繹左傳邾文公卜遷于繹注繹邾邑邾都本在鄒縣縣內有繹山境內別有繹邑史記正義曰國系云邾嶧山亦名鄒山在兗州鄒縣南三十二里魯穆公改邾作鄒其山遂從邑變山北去黃河三百餘里吾鄉景太史伯時遊嶧山記曰未至鄒二十里山甚高望之石磊磊然不見土木玲瓏嵌空紫翠涌鬱維茲山之石不相連屬方圓平敲各各異象其大者數十丈小者亦數丈如屋覆如偃蓋如走丸如斧劈如抵壁如累棊如馬首如巾敷几筵如砌如累如戲如擲其大可訝者絕頂一石高數十丈敲置平石下臨不測有可

轉而不轉之勢或曰神戲爲之旅次見壁上有女子留題者曰妾宋氏本楚人頗識詩書家貧親老爲媒氏所給嫁於燕臺之北作人側室宿此有感二絕句末云文姬遠嫁平生恨况復而今是小星雖無驚人語然文從字順亦閨中所不易有也乃所嫁非偶可勝歎惜

初六日蚤微雨行二十五里過孟廟未及展拜又十五里過中山店又三十里至兗州西關外過石橋橋名泗水十八空萬厯中魯藩之所締構也其下泗水從泗水縣來九十里經此流至濟甯說文泗水受沛水東入淮圖經曰兗州泗水縣陪尾山在縣東五十里泗水出焉或曰陪尾山有四源合爲泗因以爲名水經注曰泗水出魯下縣故城東南桃墟西北下南有姑蔑城春秋隱公元年公及邾儀父盟于蔑者也括地志兗州泗水縣木漢下縣地又三十里至滋陽縣之高吳橋高吳二氏所造故名

滋陽舊名嶺陽

初七日行五十里過汶上縣又十里渡汶水汶水源發萊蕪經此用以濟漕運民間不得引之溉田也水經注汶水出縣西南流又言自入萊蕪谷夾路連山百數里水陸多行石澗中出草藥饒松柏林藿綿蒙崖壁相望或傾岑阻徑或迴巖絕谷清風鳴條山壑俱響凌高降深兼備栗之懼危溪絕徑過懸渡之艱未出谷十餘里有別谷在孤山谷有清泉泉上數丈有石穴二入穴丈餘高九尺闊四五丈言是昔人居山之處薪爨煙壘猶存谷中林木緻密行人豈有能至矣穴外有田引灌之蹤尙存出谷有平邱土人悉以種麥云此邱不宜植稷黍而宜麥齊人相承以殖之通雅曰淮南子云汶水出弗其高誘云弗其山名在朱虛縣東酈道元云是乃東汶非水經所謂入濟者也汶出泰山萊蕪縣原山過奉高縣博縣無鹽縣自桃鄉四分曰四汶左二水雙流至無鹽郛鄉平陸故城合爲茂都澱次一汶至壽張故城爲渚右一汶經舊宿國與洽鄉注長直溝然今不可考惟汶上縣水至明又二十里至東平之沙河站

初八日行三十里過東平州東平春秋須句國黃華山在州界金翰林學士王庭筠卜居於此號黃華老

人又十五里至王瓜園過此入東阿境東阿先五世祖雲溪公以少尹攝令之治所也又四十里至舊縣東阿舊治於此水經注曰春秋經書冬及齊侯盟于柯左傳曰冬盟于柯始及齊平杜預曰東阿即柯邑也括地志曰東阿故城在濟州東阿縣西南二十五里漢東阿縣城秦時齊之阿也道旁豐碑屹立則資政大夫太子少保禮部尚書東閣大學士贈太子太保諡文定穀山于公神道公諱慎行萬曆乙酉主南畿鄉試先叔高祖惟中公其所取士也

初九日行十里過東阿縣京相璠曰今濟北東阿東北四十里有清亭春秋所謂遇于清也水色清深馬頰水東注於清濟謂之馬頰口輿圖記東阿有三歸臺謂卽管仲所築又有管仲井按包咸論語注邢昺疏皆言三歸取三姓女鮑彪注戰國策云婦人謂嫁曰歸仲蓋三取女也漢書地理志亦云管仲身在陪臣而取三歸皆不言三歸是臺名而朱子章句取劉向說苑爲據作臺解元陳孚題管仲井詩畫野分民亂井田百王禮樂散寒煙平生一勺橫汙水不信東溟浪沃天蓋井田之廢始於管仲之作內政至秦乃廢盡耳九河之壞亦自仲始世儒止知罪秦不知罪仲孚詩之所爲作也穀城山在縣境卽張良遇黃石公處漢以魯公禮葬項羽於穀城今羽墓在故穀城縣西北三里礪礪山亦在縣境劉宋檀道濟與後魏交兵於此今城南三王堆卽唱籌量沙之所又四十里至銅城驛又三十里曰三十里鋪則東昌之在平界東昌春秋齊之聊攝地又三十里至在平之西關在平魯仲連所生之鄉也唐馬周亦縣人宋逆臣劉豫僭號建僞都在此地在山名本作茌縣在山之平陸故名茌平漢書地理志作茌平後漢書郡國志作茌平今作在從東阿至此歷空撲面尋丈外不見前行有人

初十日行三十五里南爲在平北則高唐州境有木坊曰孔子臨河而歌處所謂鳴犢河也史記孔子不得用於衛將西見趙簡子至於河而聞竇鳴犢舜華之死也臨河而歎曰美哉水洋洋乎某之不濟此命

也夫乃還息乎陬鄉作爲陬操以哀之劉向新序亦載此事大略相同又十里曰綿駒故里又二十五里至高唐州又十里曰晉劉實故里又十里曰古魚邱郡又二十里至濟南府平原之要站此地平原恩縣夏津高唐四邑接壤

十一日行三十里過恩縣趙八子平原君封邑宋之貝州也廣歷中貝州卒王則據城反以文彥博爲宣撫使討擒之卽此三十里至苦水鋪其地有諺云苦水鋪神仙過留箇布以土人素狡獪也街東則恩縣轄街西則德州又四十里至德州郭外過浮橋橋下運河衛水所經之地衛河本衛漳黃河諸水合流自東昌府武城縣入州境北經河間府入海又二十里至劉智廟山東之路止於此出旅店北行則北直河間之景州往○京師大道

十二日西行五十里至景州之隆化鎮州境有董家里漢江都相董仲舒下帷之所也又六十里至真定衡水縣之西關漳水會衡水經流於此故縣以衡水名唐地理志衡水有羊令渠載初中令羊元珪引漳水北流貫城注隍一統志漳河其源有二一出山西潞州長子縣名濁漳律學新說曰發鳩山上有廟屬下有泉濁漳之源也發鳩山又名鹿谷山在長子縣西五十里漢地理志鹿谷山濁漳水所出東至鄴入清漳一出平定州樂平縣名清漳漢志大匡谷清漳水所出東北至邑城入大河過郡西行千六百八十里冀州川二水俱入彰德府境合流達衛河

十三日行四十里至深州之磨頭集州境危渡口漢光武渡漳沱河未畢而冰解之處也燕蓼麥飯二亭俱在河濱又三十里經保定之束鹿縣又二十里至新集旅店房門有額曰一小室旁題天祥書下則文山名字印記字頗佳自是鉤本

十四日行四十里至晉州又二十里過藁城之兩河集晉州藁城皆漳沱水所經之道也又三十里至無

極縣之郭莊鎮

十五日四十里至新樂縣之馬頭鋪春秋昭公十二年晉伐鮮虞余氏曰鮮虞子姓國狄之別族也在今真定府新樂縣又四十里至行唐縣西郭外以旅店湫隘借宿於文殊庵箕山在縣境相傳許由隱此上有葉瓢巖洗丹溪巢由問答碑自是城郭村落俱無茅屋屋頂塗以泥履之者如平地

十六日四十里至上羊家莊又三十里過曲陽之赤岸村望見恆山若在眉睫間是爲望祀北嶽之所考之周禮職方氏并州山鎮曰恆注云在上曲陽縣史記趙簡子藏寶符於恆山注亦云山在上曲陽漢書云常山之祠於上曲陽風俗通通典文獻通考通鑑地理通釋皆云在曲陽而宏治中兵部尙書馬端肅公文升請改祀渾源時倪文毅公岳在禮部不從其議萬厯中禮部尙書沈文恪公鯉駿大同撫臣胡來貢改祀之請疏略云恆山自太行東來綿互千里同一分野在南在北皆可指名卽以山之向背而言則祀於陰者終不若祀於陽者之爲正也蓋自漢以後天子巡幸親祠卽位祭告遇災祈禱及修常祀者二千餘年皆在曲陽未之或異祇元魏建都平城在恆山之北常於鴈門望祀恆嶽而過鄴中山石門秩禮亦猶在曲陽也至世俗所傳碑巡狩至於北嶽忽飛石墮帝前又五載其石飛於曲陽因而望祀此怪迂不經之說置之不足道也又十里至阜平之王槐鋪阜平無城郭縣尹寄治於此土人云阜平久歸併於行唐今復設者三十年王槐俗譌爲王快

十七日行五十里至阜平廢縣城郭圯已久居民數十家耳飯後涉水數處行山中草樹叢雜亂石峻嶒上下山坡有數尺者有數丈者路欹崎陡險懸崖仄徑崖側絕澗深不可測怒湍激石聲礚礚碎碎若晴雷之起於足下兩目所攝方有戒心甫上嶺而輿覆矣幸在砂磔之上若稍移數武則怪石累疊於前後輿中人恐不能無傷也又三十里至鞍子嶺之不老樹地名借宿於普濟庵此地居人項下有瘰癧者十之

七八庵僧云溪澗之水流而不止頑石硤研水面盪齧成垢人飲此水故多生疣張華博物志謂山居之民多癭腫疾由於飲泉之不流者揆之於理皆可信

十八日行四十里出龍泉關關設於正統二年隸曲陽縣在宣定之西與紫荆倒馬爲聲援五臺繁峙必

由之路也重山中立石嶺巖委折陡峻更甚於昨日募四人舁轎屈曲而上輿夫數步一息喘不自禁下

輿緩步行出長城嶺又名十八盤二十里矣水經注秦始皇使蒙恬築長城死者相屬民歌曰生男慎勿舉生

女哺用哺不見長城下戶骸相支拄其冤痛如此長城口外爲山西太原府之五臺縣境縣以山得名卽

漢之慮虜也慮虜師古曰音慮夷五臺山在縣北一百二十里柳宗元曰雲代間有靈山焉與乾巖嶺

角立相應史照通鑑注曰五臺山在代州五臺縣山形五峙相傳以爲文殊示見之地華嚴經疏云清涼

山者卽代州鴈門五臺山也歲積堅冰夏仍飛雪曾無炎暑故曰清涼五峰聳出頂無林木如壘土之臺

故曰五臺其山左鄰恆山右接天池南至五臺縣北至繁峙縣環基所至五百餘里北臺最高後人名之

爲叶斗峰一曰掖斗峰有龍湫南畔有羅侯臺南下二十里有白水池其水經繁峙縣峨谷口入淖沱其

麓有七佛池其東二十里爲華嚴嶺又東二十里爲東臺可遙見滄瀛諸州日出時下視大海猶陂澤焉

頂東畔有那羅延洞僅容人身側入洞中風寒有冰五色光采嘗從內出東南嶺畔二十里有明月池人

傳以沙帛障目下覩或見月在水中西南有青峰一名大羅頂又東去有溫湯池溫泉寺其東爲龍泉關

路東北二臺麓有金剛窟自北臺而南二十里爲中臺其巔西北有太華泉取水禱雨輒應正東左畔去

臺五里有雨花池又西十五里爲西臺危磴千雲喬林拂日頂上有魏文帝人馬蹟其西疊嶂數十里北

有祕魔巖洞天陰中有聲如風相傳卽古祕密寺木叉禪師道場西嶺畔有薩埵巖捐身巖東北下有文

殊洗鉢池東南有清涼嶺惟南臺稍遠去中臺可五十里楊升庵謂世傳文殊見於南臺號爲南埵北有

覆宿堆卽夏屋山也南臺南去麓畔有聖僧巖東三十里交口下有聖鐘山狀如覆鐘有清涼嶺西北有清涼泉泉上有羅漢洞五峰周遭如城其巔風甚烈不可居而佛寺之大者五六皆在谷中其地寒不生五穀木有松無柏亦有民人以樵采射獵爲業水經注曰晉永嘉中廬門百姓避亂入五臺山見仙人爲之先驅因而不反尋訪莫知所在俗又號是山爲仙都山中產銀盤菜卽草菌大者爲天花乃木菌五里至涌泉寺稍憩寺僧烹茶以獻庭前芍藥甫放芍藥吾鄉初夏之花今夏至此地始開昔東坡先生在海南於十一月望與客泛酒賞菊花有菊花開時卽重九之句余今在山右於夏至看芍藥與仲冬賞菊相將矣又十里至財虎川之臺麓寺殿宇巍峨廊廡宏壯金碧參差殆與日光爭炫喇嘛設齋相款雜緒雜陳不盡山肴野蔌也

十九日行十五里至金剛庫又二十五里至萬緣庵款留少頃乘騎至臺懷飽道旁蠶豆始作花登菩薩頂五臺之支山也厯石階三層計百二十餘級其壯麗同於臺麓屋瓦更五色琉璃絢爛耳望中遙見南臺蓋五臺如指在掌上列也此地有十大寺永明寺有銅殿其式同於句曲之華山萬厯中晉僧妙峰之所募造也未申間返宿萬緣庵芍藥尙含苞未放住僧云小暑前後可開是夜擁絮被

二十日天明風色涼勁著重綿山澗中結薄冰余嘗笑謂同行諸子行路以來起程時夜氣肅然如秋日將出則寒氣侵入日出既久始和融如春傍晚午則炎蒸方是夏令一日而備四時之氣諸子亦以爲然行二十里至獅子嶺望東臺白光映日觸目土人曰此山中千年冰也因言臺嶺屋上橫以木以鐵鉅繫瓦其上然風起猶飄瓦墮地云嶺路險仄募夫四名舁轎步下坂十里至繁峙縣界之獅子窩寺名淨業道場琉璃浮圖十三級萬厯中勅建所見北方浮圖不一皆不足觀惟此則仿金陵長干塔締造者寺僧肅揖入以茶進出玉白衣大士像及佛牙相示仁聖皇太后所賜余初未嘗見佛牙而此牙骨長大倍常寺

僧以爲非佛不能有此按宋程泰之曰長狄僞如之死也尸載於車眉出軌上古今中國未嘗有此巨人則佛骨之比常人特爲長大自其種類如此不得資之以信其怪也世人尊佛太甚但有一人倡言是佛俗子萬眾擊跽畏敬傾家以施焚肌以禮未有敢證其謬者故其誕得行而人惑不可得解也階下有碑吏部尙書李公世達所撰文惜字剝缺恩恩未及細讀詢寺僧亦無搨本繁峙漢地理志作時師古曰時音止史記秦祠上帝西時注索隱曰時止也言神靈之所依止也亦音市謂爲壇以祭天也考秦漢間五時皆與是邑遠不相涉而時於六書無他義于文定公慎行記曰繁峙鴈門塞下邑也城於山麓羣山環而頽之故曰繁峙由是言之則魏改時爲峙者近是又十里至茶鋪又三十里至巖頭村自十五日過行唐所歷皆層山複嶺土人有鑿山爲穴入居其中者詩所謂陶復陶穴也是日同行乘騎諸子走華嚴嶺及應州州以應名者以龍首鴈門二山南北相應也

二十一日雨行三十里至代州之峨口前是山徑崎嶇步騎皆艱出峨口路始坦夷遙望平曠無際石田曠土蕪穢不治者多矣爲之太息使有如漢三老力田及里父老善田者教以耕闢種藝之法邱陵阪險因其勢土壤墳墟辨其宜引水泉以開通溝瀆耕耘播種以時農事修而閭閻之生養可遂或曰穀一熟也而或再熟收穫種也而或以春九域殊方固未可以一道論也然昔人有言必母倉生氣下種則一年可構之日少必草人法糞田亦恐竭澤不得鹿墳壤之不得壘也易曰通其變使民不倦神而明之存乎其人是以太公封而斥鹵播嘉穀鄭白渠成而關中無饑年則汜勝之齊民要術顧安可置弗講也又嘗讀顧甯人日知錄云春秋之世田有封洫故隨地可以設關而阡陌之間一縱一橫亦非戎車之利也然則盡力於南畝不獨可以足民用而亦可以防寇鈔矣又三十里過淖沱河周禮職方氏正北曰并州其川淖沱山海經曰泰戲之山淖沱之水出焉泰戲繁峙山也淖沱經流代州崞縣忻州定襄五臺孟縣入

北直眞定府界又十里至代州州名代自隋始洪武初爲代縣八年仍陞爲州非秦漢之代郡代郡則今蔚州是也州有代谷梅福曰代谷者恆山在其南北塞在其北上谷在東代郡在西是其地也

二十二日行二十五里至富家坪路甚陡募夫四名昇轎又五里出鴈門關關在山巔重門峭壁依險而成代州繁峙崞縣附其趾應朔馬邑環其背爲全晉咽喉山海經鴈門之山鴈出其間注云在高柳北高柳在代北水經注高柳在代中其山重巒疊嶂雲霧高連山隱隱東出遼塞史記蘇意軍句注應劭曰山險名也在鴈門陰館爾雅西踰鴈門是也郭璞曰卽鴈門山秦分天下爲三十六郡鴈門其一枕山巔之東偏有武安君廟正德中以北寇跳梁當路思趙將李牧備塞之功建廟祀之又二十里至廣武城之南關達沙陀之大道也圖經曰在句注陘南口之南晉咸寧元年句注碑曰蓋北方之險有靈龍飛狐句注爲之首天下之阻所以分別內外也廣武秦縣屬鴈門郡漢高帝械繫劉敬於此一名古鴈門城自鴈門至此皆因山爲城其一人守險萬夫莫能過者過此則大同之馬邑界縣境有馬頭山水經注魏土地記云馬頭山其側有鍾乳穴趙襄子旣害代王迎姊代夫人夫人磨笄自刺而死民憐之爲立祠屋於山側因名之爲磨笄山史記謂在夏屋山未詳孰是搜神記云昔秦人築城於武周塞以備胡將成而崩者數矣有馬馳走周旋反覆父老異之因依以築城乃不崩遂名馬邑漢王恢置馬邑旁谷中誘匈奴卽此莽翁臺馬邑人唐尉遲恭朔州鄆陽入都陽卽馬邑也

二十三日四十里至振武衛之老羊寨洪武初首振武軍節度使爲衛者也天啟乙丑高邑趙忠毅公南星遣戍振武僦居一小樓顏曰吉祥又掃除土室曰味槃齋已遇肆赦巡撫故遲遲遣行竟卒於戍時年七十有八矣過寨卽山陰縣境山陰秦爲鴈門陰館縣地遼曰河陰以桑乾環其北也金曰山陰以縣在覆宿之陰也又三十里募夫十人昇轎渡桑乾河桑乾源出馬邑洪濤山流經山陰應州大同縣界東

南入渾河直達順天之蘆溝橋按水經其河源自太原汾陽燕京山之天池伏流至朔州馬邑雷山之陽
應爲七泉合而爲一是謂桑乾河十三州志曰武州之燕京山亦管涔之異名也又十里至岱岳村

二十四日四十里至尚希村又四十里至懷仁縣之東關縣志云因阿保機與晉王李克用面會東城取
懷想仁人之義按晉王與阿保機約爲兄弟期共擊梁阿保機歸而背盟更附於梁仁人之義安在也

二十五日行三十里渡渾河河源出渾源州之歎土峪匯爲大澤名渾源川西流至應州龍首山折而北
入桑乾踰蘆溝而東入於海以渾源乳泉鑿峽崢嶸川李峪遠望峪神谿亂嶺關八水合而渾流故曰渾
河至大同縣之繡女村又四十里至大同府進西門入府署大同秦爲雲中郡水經注趙侯於河西造大
城不就乃改下陰山河曲而禱焉書見羣鵠游於雲中徘徊經日見大光在其下乃卽於其處築城今雲
中城是也曰大同者以大同川名也一統志以大同爲雲中而郡志以豐州雲西爲古雲中豐州去大同
西北五百里白登山在城東七里後人築臺於山上謂之白登臺漢書冒頓圍高帝於白登七日卽此地
也師古注白登在平城東南去平城十餘里按宋紹興十一年依元符三年長安本禹迹圖立石山在今
府城之西蓋舊府城在白登東南也舊郡志云白登在城東北一百四十里通志圖有大白登小白登大
白登在陽和天城衛間漢書武帝自雲陽北歷上郡西河五原出長城北登單于臺是單于臺與白登臺
固自爲二後人以孝武所登之臺同於高帝被圍之白登蓋因北登字音近而譌爾紇真山亦名紇千山
在府城東北五十里其山冬夏積雪故諺曰紇千山頭凍殺雀何不飛去生處樂平城在城東五里本漢
鴈門郡平城縣晉懷帝時劉琨表以拓拔猗盧爲大單于封代公徙馬邑城盛樂以爲北都修故平城以
爲南都愍帝進猗盧爲代王道武帝立都雲中改代曰魏自雲中徙都平城五代石敬瑭以契丹援立爲
晉帝代唐割山前代北十六州爲賂大同屬之遼因建爲西京金因之遼史志元魏之宮垣占城之北面

雙關尚在則舊大同城也城之西門有二土臺蓋遼金宮闕門近元魏宮垣故址明代藩并郡王十一朱邸皆在城內今蕩析爲民居僅存街南之外屏出東郭三里許御河西岸有柳港寺浮圖三級東望平城元魏永固陵及明代府諸墓園皆蕪沒於荒煙野草中矣可勝興亡之感寺稍北有橋曰興雲元學士虞集有記橋十九空長五百八十步橋下如渾水自北注南下流合桑乾河遇積雨水益橫溢頗有衝沒行人之患惜無塘堰爲瀦水之地開溝洫導之使灌田耳距西郊三十里曰雲岡山勢聳拔雄峙倚山架木爲樓三層因石鑿佛像高與樓齊飛檐重巒雕鏤案制度頗闊偉樓外綠樹扶疏翠巘拱列武州川水經流其下水經注魏土地記曰平城宮西三十里武周塞口者也自是而西北蘇武城昭君冢拂雲堆三受降城在郡境遠近不一然皆隱隱若可見云晉晉羊叔子造峴山置酒言詠嘗慨然歎息顧謂從事中郎鄒湛曰自有宇宙便有此山由來達賢勝士登茲遠望如我與卿者多矣皆湮滅無聞使人悲傷余因慨蔡邕髡鉗徙朔方居五原之安陽洪皓使金留滯雲中載在後漢書及宋史甚著非湮滅無聞者而雲中舊志不能舉其事殊非緬仰前徽之義余今睇茲名蹟雖不能至而心嚮往之嗟乎豈獨叔子峴山爲可感哉

九月十九日己亥從大同府署返轡七十里宿懷仁孟夏來雲中時與匯村均茵馮今竟載其匿而歸也

不勝黯然

二十日八十里宿岱岳村

二十一日八十里宿古鴈門城

二十二日二十里入鴈門關山中積有堅冰蓋重九後一日所雨雪也又五十里宿羊頭城

二十三日四十里至崞縣釋名崞本漢舊縣屬鴈門郡一統志云縣西南有崞山漢以此名縣大同志古

崞縣在渾源州城西十五里崞川在渾源州東北發源至應州西安鎮折而北流注桑乾河則崞似又以川名也地理志樓煩縣屬鴈門應劭曰故樓煩戎也故城在代州崞縣東北又四十里至原平驛

二十四日四十里至忻口土地記云州北五十里有忻口山漢高帝出平城圍還師於此六軍忻然故名至今有忻口故城又四十里宿忻州之南門釋名忻州本東漢新興郡隋改忻州取忻水名也忻水一名雲中水與州南牧馬水合入滹沱河近北門有木坊曰公孫杵曰驛州境有程嬰公孫杵曰墓考之宋元豐中吳處厚以皇嗣未立主書之立一八廟訪求其墓於是勅河東訪尋遺蹟得其冢於絳州太平縣詔封嬰爲成信侯杵曰忠智侯廟食於絳洪文敏邁辨之曰春秋於成公八年書晉殺趙盾趙盾十年書晉景公卒相去二年而史記乃有屠岸賈欲滅趙氏程嬰公孫杵曰共匿趙孤十五年景公復立趙氏之說以年世考之則自同括死後景公又卒厲公立八年而弑悼公立又五年矣其乖妄如是且自景公至元豐千六百五十年古聖帝明王之墓尙不可考區區二士豈復有兆域所在絳郡以朝命所訪姑指他邱壠爲之辭以塞責耳此事之必不然者也其說核而可據黃東發亦謂無其事明京山李本甯據左氏傳趙盾通於朔妻莊姬證同括於晉侯殺之其時朔已久死安得有遺腹孤卽謂私嬰而娠杵曰忠於朔奈何以妻緒交緞亂朔之遺體而史記云然豈趙之子孫諱莊姬淫惡趙盾弑逆遂藉口屠岸賈爲亂階又詭爲杵曰功以實之邪漢武時左傳未出子長自言宋世本國語不及左氏不爲嬰杵曰特傳而附見於趙世家毋亦不盡信書之意其詞甚晰頗可參考今忻州復有二人墓大抵皆後人之傳會也二十五日五十里至陽曲之三和店陽曲秦狼孟地漢置陽曲縣以有陽曲川故名應劭曰河千里一曲當其陽故曰陽曲也又三十里宿黃土寨

二十六日四十里至新店又二十里過太原府循早成振武二門太原唐則天以後名爲北都五代李氏

石氏劉氏三主皆興於此尙書蔡氏傳曰大而高平者謂之太原小爾雅云高平謂之太原春秋曰大鹵曰晉陽皆太原之異名杜預曰太原近戎而塞不與中國同其地蓋華戎錯居日知錄曰薄伐玁狁至于太原毛鄭皆不詳其地以爲今太原陽曲縣者始於朱子愚未敢信古之言太原者多矣若此詩則必先求涇陽所在而後太原可得而明漢書地理志安定郡有涇陽縣後漢書靈帝紀段熲破先零羌於涇陽注涇陽屬安定郡在原州郡縣志原州平涼縣本漢涇陽縣地然則太原當即今之平涼而後魏立爲原州亦是取古太原之名計周人之禦玁狁必在涇原之間若晉陽之太原在大河之東距周京千五百里豈有寇從西來兵乃東出者乎禹貢既修太原春秋晉荀吳帥師敗狄于太原及子產對叔向宣汾洹障大澤以處太原則是今之晉陽豈可以晉之太原爲周之太原乎又三十里宿太原縣之小店子地理通釋云帝王世紀帝堯始封於唐後又徙晉陽今太原縣也於周在并州之域晉水在縣西南山海經曰縣雍之山晉水出焉雍音漢志龍山在晉陽縣西北晉水所出元和志縣饗山一名龍山

二十七日五十里至徐溝縣之北門縣本清源之徐溝鎮金大定中割平晉清源榆次三縣地置爲縣從舊鎮名也又四十里宿祁縣之白圭鎮祁本春秋晉大夫祁奚食邑卽周禮并州藪昭餘祁之地也魯昭公二十八年晉滅祁氏分其地以祁封大夫賈辛漢武帝封李喜爲祁侯乃徙築城於西北元魏太和中又徙築於西北卽今縣治

二十八日五十里至盤陀鎮又四十里宿沁州之南關驛沁本春秋晉銅鞮地州南有銅鞮城晉大夫羊舌赤邑西有閼與城趙奢大破秦軍解閼與之圍卽此郡國志上黨潞縣有閼與聚括地志閼與聚城今名烏蘇城在潞州銅鞮縣西北二十里行竟日兩山夾路亂石懸落涉水數十處騎足惟踏石塊谷礫有聲賈明登車日暮宿旅館十日已來朝餐惟雞卵或餽餽一二至此始飯脫屣